

GURE DIRUA
TXORAKERIETAN
GASTATZEN DUZUE

ZERBITZU PUBLIKO
ETA LAN BALDINTZA
DUINAK

URRIAK 25
ABENDUAK 19 **GREBARA !**



UTZI GURE DIRUA TXORAKERIETAN GASTATZEARI

Ohituta gaude gobernuek erabaki-organoa Madrilen, Iruñean edo Gasteizen dutela ikustera. Baita udal eta aldundietan **gastu publikoa handitu ezin dutela** edota gero eta zaharkituagoa dagoen sektore publikoko plantillak berriztu ezin dituztela entzutera ere. Antza, ezin dute lan-hobekuntzarik egin, batez ere lanaldi eta soldatei dagokienez.

Estatuaren aurrekontu orokorren mende dago dena, dena... ez! (abesti ospetsu batek dioen bezala). Izan ere, badira **kontrol horretatik libre dauden proiektu faraonikoak**, denak ere klientelismoak, gainkostuek eta ustelkeriak markatuta.

Dirua egon, badago. Europako “**Next Generation**” funts pozoituak (erdia interes handiko mailegua), Iberdrola edo Petronor bezalako enpresa handietara bideratzen dora. Dirua badago lagunen artean banatzeko ere; **De Miguel, Tellería, Otxandiano, Bravo, Elorriaga, Margüello, Erezuma, Zulueta edo Errenteria** abizena dutenen artean, alegia. Dirua egon, badago diru publikoa I Formulako **Epsilon Euskadi** taldean edota **Hiriko** izeneko auto elektrikoan xahutzeko, baita **Balenziaga** museoan eta **Supersur** autobidean ere, eta nola ez, koroaren bitxian: **abiadura handiko trena** (martxan jarri nahi dutenerako zaharkituta geratuko dena, diru publikoko milaka milioi euro gastatu ondoren).

Hezkuntza-itunetarako ere 816 milioi euro daude, baina Euskal Eskola Publikoak benetako arazoak ditu kalitatezko zerbitzua eskaini ahal izateko. Bada dirurik ere **unibertsitate-zentro pribatuentzako; Basque Culinary Center** edo **Euneiz**. UPV-EHUko hainbat campusetako paretak, aldiz, erori egiten dira. Tolosako **Asuncion klinika** pribaturako dirua dago, baina ez Tolosaldeko ospitale publikorako. **Osakidetzako garbiketa eta garraiorako kontratatzen diren enpresa emakidadunen** diru-kutxak betetzeko dirua dago, baina ez dago halakorik azpikontrataturako langileen lan-baldintzak hobetzeko. Are gehiago, dirua dago Ambulancias La Pau bezalako enpresek 100.000 euro baino gehiago ordain ditzaten laneko segurtasun eta osasunaren arloko hainbat arau hautsi ostean, eta zerbitzua kudeatzen jarrai dezaten.

Hala ere, **zerbitzu publikoak eta enplegatu publikoen lan-baldintzak hobetzeko dirurik ez** dagoela esan digute, baina ESK eta STEILAS sindikatuok badakigu gezurra dela, eta **erabaki eta borondate politikoaren kontua baino ez dela.**

Birjartze-tasak gainditu egin dira gobernuek eta alderdi politikoek hala erabaki dutenean. EAJk hala negoziatu zuen Estatuko 2014ko eta 2017ko Aurrekontu Orokorretan Ertzaintzarentzat, baina ez gainerako zerbitzu publikoentzat, argi eta garbi erakutsi baitu zer lehentasun duten zerbitzu publikoen defentsan.

Horrek gauza bi erakusten ditu: Batetik, 2010etik aplikatzen ari diren austeritate-politiken gaineratik **hobekuntzak lor daitezkeela**, eta **diru publikoaren banaketa** gobernuek zuzentzen eta Estatuko edo EAEko administrazioetako aurrekontu orokorrak negoziatzen dituztenen **jarrera ideologikoen mende** dagoela. Erretiro-primak, soldata-hobekuntza duinak edo beharrezko enplegu publiko guztia sortu eta egonkortu nahi izanez gero, egin daiteke. Borondate politikoa baino ez da behar.

Bada garaia mugitzeko, zerbitzu publikoetako langile guztientzako **lan-hobekuntzak lortzeko** eta gobernuek **kalitatezko zerbitzu publikoetan inbertitzera** behartzeko, euskal herritar guztien eskubideak bermatzen baitituzte.

Horretarako, urriaren 25ean eta abenduaren 19an greba egingo dugu.

Ez dezatela gure dirua alferrik zahutu, eta inbertitu dezatela lan-baldintza duinak eta kalitatezko zerbitzu publikoak bermatzeko!

Greba egiteko unea da!

OSAKIDETZA GREBARA !

Osakidetzan lan egiten dugunok egunero pairatzen dugu nola hondatu dute Osasun Publikoa. Ikusi besterik ez dago nola gertatzen diren mobilizazioak hainbat ESItan zehar; nola borrokatzen diren biltegietako plantillak, Gurutzetako larrialdietako langileen batzarra, larrialdietako zerbitzukoak, TGEEZ, Santiagoko eta Txagorritxuko ebakuntza-geletako langileak, lehen arretako lankideen borroka, langile falta, nola handitzen diren lan-kargak, kontziliazio neurri eraginkorrik ez dagoela, zein gaizki kudeatzen diren LEPak eta kontratazio-zerrendak, eta abar.

Herritarrak ere jakitun dira eskaintzen den zerbitzuaren prekarietateaz, eta agerian geratzen da inkestetan Osakidetzaren egoera bigarren kezka bihurtu dela Deustobarometroaren datuen arabera. Inkesta horrek berak erakusten du, halaber, herritarrek Osakidetzari suspentso bat ematen diotela azken hamarkadan lehen aldiz. Herritarrak argi daukate, eta aspalditik ari dira auzoka eta udalerrika antolatzen, kalitate-galera horri erantzuteko.

Arazo horiek lan-baldintzen okertzearekin lotuta daude argi eta garbi, eta, hala ere, Sagardui sailburuak adierazpen batzuk egin ditu duela gutxi, egia ukatuz eta mobilizazioak bere gobernuaren aurkako konplot moduko bati leporatuz. Biktimismo hori errealitatea ukatzeko modu bat da, eta Osakidetza duin bat izateko irtenbide ausarten bilaketa atzeratzen du.

Sagardui andrea, Osakidetzako langileak kalera aterako gara zerbitzu publikoen duintasuna berreskuratzeko. Hemen dagoen konplot bakarra Zerbitzu Publikoen desegiteatik onurak ateratzea besterik pentsatzen ez dutenena da.

ESK-k greba hauen kanpainan esaten dugun bezala, “Gure dirua txorrakerietan gastatzen duzue”. Osakidetzak adreiluan gastatzen du gure dirua, bere langileekin egin litzakeen zerbitzuak azpikontratatzeko, eta zerbitzuak privatizatzeak eragiten dituen gainkostuak ordaintzen gastatzen du gure dirua. Gure dirua autokontzertazioetan eta Osasun Pribatuari ordaintzen gastatzen du itxaron-zerrendak murrizteko, baliabide propioekin egin beharrean.

ESK-tik argi daukagu, Osakidetzak alferrik gastatzen duen diru hori guztia gure lan-baldintzak duintzen gastatu behar da, zerbitzu publikoak duintzen, plantillak handitzen, behin-behinekotasuna desagerrarazten, euskalduntze-planetan langile publiko guztiek euskaraz ikasi eta lan egin ahal izateko behar diren baliabide guztiekin, baliabiderik gabeko konpromisoak konpromiso hutsak direlako. Berdintasunerako eta kontziliaziorako neurrietan aurrera egin behar da. Gaur egun enpresa pribatuen esku dauden zerbitzu guztiak publikatu behar dira. Azken 14 urteetan %20 inguruko erosteko ahalmenaren galerarekin amaitu behar da.

Orain da garaia, aukera bat dugu euskal alderdi politikoek Zerbitzu Publikoen hobekuntza inbestidura- eta legegintzaldi-eztabaiden erdigunean jartzeko.

Horregatik guztiagatik, ESK-k urriaren 25erako eta abenduaren 19rako grebetan parte hartzera animatzen zaituztegu. Zerbitzu publikoen eta lan-baldintza duinen alde.

GREBARA!

URRIAK 25 | ABENDUAK 19
GREBARA !

25 OCTUBRE MANIFESTAZIOAK

DONOSTIA	11:30ean Bulevar
BILBO	11:30ean Gran Vía 85
GASTEIZ	11:30ean Legebiltzarra

esk
sindikatuak


steilas